

張文襄公奏議

張文襄公全集卷二十七

奏議二十七

籌設煉鐵廠摺

光緒十五年八月二十六日

竊以今日自強之端首在開闢利源杜絕外耗舉凡武備所資槍礮軍械輪船礮臺火車電綫等項以及民間日用農家工作之所需無一不取資於鐵兩廣地方產鐵素多而廣東鐵質尤良前因洋鐵充斥有礙土鐵經臣疊次奏請開除鐵禁暫免稅釐復奏免爐餉請准任便煽鑄以輕成本而敵侵銷多方以圖無非欲收已失之利還之於民查洋鐵暢銷之故因其向用機器煅鍊

精良工省價廉察華民習用之物按其長短大小厚薄預製各種料件如鐵板鐵條鐵片鐵鍼等類凡有所需各適其用若土鐵則工本既重鎔鑄欠精生鐵價值雖輕一經練爲熟鐵反形昂貴是以民間競用洋鐵而土鐵遂至滯銷以本省鐵貨出入計之每年洋鐵入廉州者約四五十萬斤入瓊州者百萬斤有奇入省城佛山者約一千餘萬斤入汕頭者約二百餘萬斤內地鐵貨出洋以鍋爲大宗其往新嘉坡新舊金山等處由佛山販去者約五十餘萬口由汕頭販去者約三十餘萬口由廉州運往越南者約四萬餘口此外鐵鉞運往澳門

等處者每年約五六萬斤鐵纜運往越南者先年約十餘萬斤近因越稅太苛業經停販然此皆粗賤之物凡稍精稍貴之鐵板鋼條則不惟不能外行且皆取資洋產以各省各口鐵貨出入計之查光緒十二年貿易總冊所載各省進口鐵條鐵板鐵片鐵絲生鐵熟鐵鋼料等類共一百一十餘萬擔鐵針一百八十餘萬密力每一密力爲一千針合共鐵價針價約值銀二百四十餘萬兩而中國各省之出口者銅鐵錫併計祇一萬四千六百數十擔約值銀一十一萬八千餘兩不及進口二十分之一至十三年貿易總冊洋鐵洋針進口值銀二

百一十三萬餘兩十四年貿易總冊洋鐵洋針進口值銀至二百八十餘萬兩而此兩年內竟無出口之鐵則是土鐵之行銷日少再過數年其情形豈可復問臣督同海防善後局司道局員暨熟識洋務之員詳加籌度必須自行設廠購置機器用洋法精煉始足杜外鐵之來惟是廣東近年餉繁費絀安有餘力更爲斯舉然失此不圖惟事以銀易鐵日引月長其弊何所底止計惟有先籌官款墊支開辦俟其效成利見商民必然歆羨然後招集商股歸還官本付之商人經理則事可速舉貲必易集大率中國創辦大事必須官倡民辦始克有

成經臣於本年三月間電致出使英國大臣劉瑞芬往返籌商數月之久茲准劉瑞芬電復現與英國諸塞德公司鐵廠訂定鑄鐵大爐二座日出生鐵一百頓並煉熟鐵煉鋼各爐壓板抽條兼製鐵路各機器共價英金八萬三千五百鎊先匯定銀二萬七千八百三十三鎊運保費在外機器分五次運粵十四箇月交清等語當經飭局將定銀鎊價折合銀十三萬一千六百七十兩零如數先行籌匯訂立合同至於建廠地方擇定於省城外珠江南岸之鳳凰岡地方水運便利地勢平廣甚爲相宜俟繪就廠圖寄粵卽當趕緊建造此購辦機器

自設鐵廠之擬辦情形也竊惟通商以來凡華民需用之物外洋莫不仿造窮極精巧充塞土貨彼所需於中國者向祇絲茶兩種近來外洋皆講求種茶養蠶之法出洋絲茶漸減愈不足以相敵土貨日少漏溢日多貧弱之患何所底止近來各省雖間有製造等局然所造皆係軍火於民間日用之物尙屬闕如臣愚以爲華民所需外洋之物必應悉行仿造雖不盡斷來源亦可漸開風氣洋布洋米而外洋鐵最爲大宗在我多出一分之貨卽少漏一分之財積之日久強弱之勢必有轉移於無形者是以雖當竭蹶之時亦不得不勉力籌辦至

於開采鐵礦尤須機器西法始能鉤深致遠取精出旺
臣現已分向英德兩國聘募礦師來粵勘驗以便購機
精采礲物力稍紓尙擬將民間需用各鐵器及煤油火
柴等物悉行自造將來鑄造漸多豈惟粵民是賴尙可
分銷各省一俟機器運到開煉以後辦理情形再當隨
時詳晰具奏

硃批戶部議奏欽此

派員募勇分路緝捕片

光緒十五年八月二十六日

再粵省盜案之多以南海番禺順德三縣爲尤甚前經
派定緝捕船勇雖弋獲不少而地方遼闊河海紛歧現

有緝捕兵勇以之追緝搜捕尙可致力若欲防護各路鄉鎮絕其打單實屬不敷分布臣熟加籌度港澳藪匿盜匪雖竭力與之籌商誠恐一時猝難就範惟有合力大舉將劇盜大夥痛加懲創數次一年數月之後匪黨內刦之謀漸知畏戢各鄉恃有官軍始敢拒其打單之需索被打單不行無以爲賄串包庇之資一面與英國外部剴切熟商務令酌改交犯章程驅逐在港匪徒並商葡國一律協助庶可從容清理現經添募勇船將三屬分爲六路派令署廣州協副將黃金福充當總辦駐紮中左路專任南海五斗黃鼎神安番禺鹿步一帶署

督標後營參將補用都司蒙啟森分辦中右路專任南海江浦九江順德江村一帶署水師提標左營遊擊黃增勝分辦西路專任南順交界之西海馬甯一帶本任南澳鎮右營遊擊陳榮輝分辦東路專任順德之陳村番禺之沙灣菱塘一帶署順德協副將鄭潤材分辦南路專任順德縣城附近及容奇挂洲紫泥一帶已革清遠營遊擊莫善喜分辦北路專任南海之三江金利番禺之慕德里一帶除鄭潤材原有船勇外其餘五路各募緝勇五百名每路各撥給中輪小輪各一號拖船扒船各十號配齊礮械如有不敷就近雇用勇糧船租等

項均由善後局照章發給又省城地面五方雜處搶竊頻仍現飭總辦保甲局務候補道劉鎮楚添募壯勇三百名分段巡察以靖地方一俟盜風漸息捕務稍鬆再行酌量裁併現嚴定賞罰章程各專責成如能盜息民安著有成效當予從優獎勵儻所分地段仍任盜匪往來不能攔截捕獲定卽嚴加參處

硃批該衙門議奏欽此

爲鄧安邦請卹并請立傳摺

光緒十五年八月二十八日

竊查已故原任潮州鎮總兵鄧安邦籍隸東莞縣年少貧甚勤力養親有孝友之稱粵東盜起應募爲團練勇

自咸豐四年會匪李文茂黨數萬犯省城北門官軍失利該故鎮時帶團練三百禦賊於小磨盤山戰獨力賊終敗走時前督臣葉名琛於五層樓以遠鏡觀戰見一壯士縱橫盪決所向無前傳見詢姓稱之爲鄧勇士撥入廣州協充伍以外委拔補此該故鎮在粵立功知名之始也自時厥後屢隨官軍先後克復順德和平等縣攻破匪巢多處七年英人肇釁攻廣州該故鎮以勇丁五百禦之東郊遇於三寶墟鏖戰勝之是役也尤爲粵人所稱迨和議成英人於稠人中見之亦指謂曰此勇將也旋以緝拏土匪會匪海盜積功累擢都司賞戴花

翎同治三年髮逆餘孽分竄福建江西等處將窺廣東
粵人大震該故鎮隨同前廣東布政使李福泰帶勇堵
剿時逆首丁太陽等擁眾數萬踞福建之武平縣閩粵
各軍會攻久未克福泰予以五千人馳至遂與方耀吳
贊誠等會師連拔之由峰市進攻永定踞匪而丁太陽
竄陷詔安該故鎮進紮下饒之分水關賊以大隊如牆
而進該故鎮躍馬自以擡槍隊擊之賊不少卻復出馬
隊來犯該故鎮令從弟鎮邦抄其右賊驚走遂薄詔安
城連戰克之是役也該故鎮屢出奇兵功最著時康逆
汪海洋陷鎮平縣聞李福泰駐平遠繞截餉道圍平遠

該故鎮赴援馳兩晝夜抵城下饑疲無糧雜取芋薯食
之力戰獲勝賊復以馬隊由校場山後猱騰上城幾入
矣該故鎮戰益急賊始潰退再敗之於大柘降其利酋
朱興隆掃九嶺茶園等賊連營七座平之又連破安仁
老墟賊營十餘座攻破坑口大巢斬其偽酋多名遂破
超竹大柘賊巢時道員康國器以閩軍入境該故鎮爲
之嚮導戰屢勝降其偽天將譚富會閩粵諸軍收復鎮
平縣城廓清花旗餘黨康逆竄江西不利折回闕入和
平縣城該故鎮追及復竄連平再走和平該故鎮與方
耀等威之於白沙荆頭追至下車賊渡河而東該故鎮

從之賊疾走三百里陷嘉應州遂會江閩諸軍合圍克復嘉應州城髮逆全股蕩平論功擢遊擊加參將銜並賞給銳勇巴圖魯名號同治六年帶勇隨剿曹冲客匪連戰屢勝事竣陞參將加副將銜又剿捕土匪多起擢副將光緒四年匪徒闖入佛岡廳城該故鎮帶勇會同鄭紹忠剿平之擢記名總兵丁母憂尋丁父憂起復簡放潮州鎮總兵光緒十四年十一月因公來省舊疾舉發遂以不起此該故鎮頻年立功積勞病故之實在事蹟也臣伏查鄧安邦以勇目奮跡行間轉戰本省外省各處克復多城剿平土匪多起大小三百餘戰未嘗敗

飭捕斬劇盜尤不勝數平日躬行節儉而厚於養士遇
事推誠故士卒樂於用命所向有功所部弁兵團勇頗
多驍悍難馴之徒該故鎮善於駕馭能令各盡其長該
故鎮與提督方耀鄭紹忠齊名有粵東三將之稱光緒
十年臣來督粵時法越構釁防務方殷該故鎮尙未服
闋臣奏委署理廣州副將統率重兵調集團練駐守魚
珠築成洋式礮臺七座自創地雷地營軍民輯睦深資
捍衛事平後連年講求海防所有籌款咨商閩廠協造
兵輪以及添購臺礮船礮查辦沙田辦理匪鄉等事該
故鎮贊成之力爲多臨歿之際語不及私所具遺稟惟

以綏靖地方爲念實屬一時良將未易多得臣前於奏報該故鎮出缺時曾經聲明俟查明戰功事蹟奏請賜卹在案茲經查明合無仰懇天恩敕部照軍營立功後病故例從優議卹並將該故鎮戰功事蹟宣付國史館立傳俾垂不朽而勵戎行

硃批著照所請該衙門知道欽此

遵旨籌辦鐵路謹陳管見摺

光緒十五年九月初十日

竊臣承准軍機大臣字寄光緒十五年八月初二日奉上諭朕欽奉 慈禧端佑康頤昭豫莊誠壽恭欽獻皇太后懿旨總管海軍事務衙門奏遵議通籌鐵路全局

一摺據稱擬照張之洞條陳由盧溝橋直達漢口現在先從兩頭試辦南由漢口至信陽州北由盧溝至正定府其餘再行次第接辦并臚陳籌款購地各節所奏甚爲賅備業據一再籌議規畫周詳卽可定計興辦著派李鴻章張之洞會同海軍衙門將一切應行事宜妥籌開辦並派直隸按察使周馥清河道潘駿德隨同辦理以資熟手此事造端閔遠實爲自強要圖惟創始之際難免羣疑著直隸湖北河南各督撫剴切出示曉諭紳民毋得阻撓滋事總期內外一心官商合力以藏全功而裨至計餘均照所請行將此各諭令知之欽此茲於

九月初七日承准總理海軍事務衙門抄錄原奏咨行到粵竊惟此舉造端宏大乃國家自強之遠謨 聖上不以臣病軀庸材爲不肖命與李鴻章同肩此舉艱鉅重任豈敢辭諉惟是開非常之源必當出萬全之計大學云物有本末又云知所先後古今常變理無不賅就今日鐵路一事論之則不外耗爲本計利便爲末儲材爲先興工爲後就外洋富強之術統言之則百工之化學機器開采製造爲本商賈行銷爲末銷土貨敵外貨爲先徵稅裕餉爲後現經廟堂定議開辦順直豫鄂一道按海軍衙門原奏計程三千餘里計費三千餘萬需款

需鐵均屬極鉅若取資洋債洋鐵則外耗太多且外洋金鎊之價日貴前五年止銀三兩七錢今年漲至四兩五六七錢不等借款鉅則年限遠十年以後更不知漲至幾何矣至洋鐵現亦驟漲若購之他國法人必將執乙酉新約強思獨攬多滋唇舌設竟專歸一國彼壟斷居奇更不可問是洋款洋鐵兩端皆必致坐受盤剝息外有息耗中有耗臣前奏鐵路之益專爲銷土貨開利源塞漏卮起見若因鐵路而先漏巨款似與此舉本意未免相戾至臣前奏原擬各省招股准該公司暫借商款墊辦以資周轉因欲責成該公司承辦不得不略予

通融俾其作速興工以免藉口津通賠累堅執推諉且
墊辦不過初年所借亦屬有限自尙無妨今旣經海署
確核路長費鉅此斷非該公司所能獨任其遲速盈虧
自宜從長另計臣竊審此事推行之序似宜以積款采
鐵煉鐵教工四事爲先而勘路開工次之試就海署原
奏需款三千萬限期十年之數計之若將鄭工新改海
防捐例再酌減一二成每年可收一百萬以外至二三
百萬洋藥稅釐除戶部指撥外尙有贏餘每年亦可指
撥一百萬此兩款每年將及三百萬由戶部提存專儲
爲鐵路之用若仍不敷竣工稍展一二年似亦無妨款

既有著卽一面急求煉鐵采鐵之方查晉鐵並非不善
特由煎煉未精若多購略小機爐分拆轉運到地裝合
足可運入晉境尙無須遽造鐵路此節已向外洋詢明
平孟鐵出自小范卽可由清河運澤潞鐵出至衛輝卽
可由衛河運粵亦產鐵近由臣購定機器設廠鎔煉業
經奏明在案由粵至鄂水運可通聞湖北大冶縣向來
產鐵該縣近省濱江俟到鄂後當詳晰勘明妥籌采煉
之法有此三省之鐵卽可供此幹路之用目前宜卽揀
派曾經出洋學生一二十人分赴鐵路各國專習此藝
俟兩年回華指授工匠展轉傳習則工作并可無需洋

匠多人此時專講采鐵煉鐵俟新鐵之采日旺舊鐵之煉日精彼時積款已足路工已嫻再爲定期開工修路兩端並舉一氣作成合計亦不過十年內外查美國每年添造鐵路或一二千里或六七千里足見工料應手並不甚遲至分段辦理一節海署所奏南北並舉之法極爲扼要臣前奏分爲四段辦法不過約略計費之詞似宜分爲南北兩路黃河以北至盧溝爲北路直隸督臣任之黃河以南至漢口爲南路湖廣督臣任之其道里遠近約略相等豫境跨河兩路均宜兼令河南撫臣會同辦理如此則首尾一氣其勘路運料一切便於合

計通算緣南路開造卽宜由漢口直造至河南省城則
路成之日商旅立見輻輳若信陽尙非繁盛都會僅造
至此運載尙少經費難敷橋道雖多惟黃河一橋最爲
鉅費聞外國鐵路遇有大河則以輪船數艘上安鐵軌
接渡火車所延不過數刻所省費多且可留此天險以
備不虞其出示一節似可從緩俟興工有日再當剴切
曉示蓋民間不知鐵路爲何事漢口游民甚多會匪尤
眾况山東水災甚廣流民四出此時開辦尙早卽不宜
驟爲宣示致令莠民地棍造言煽惑別滋事端臣曾電
南北洋大臣暨河南撫臣均以爲然至鐵路利民之端

尤莫如差徭一事直豫兩省最苦差累胥吏拉派車驟重價勒索錢糧正銀一兩差銀攤至加一兩倍若火車暢行所有官差兵差貢差皆由火車於民間一無所取從此爲北省驛路小民永除鉅累若并將此節剴切曉諭地方自必欣悅其經由之路實在里數若干有無應改應避之處應俟到鄂後詳加考究派委妥員密爲相度詳慎辦理如有失業之人亦須豫籌安插總以不致疑累擾民爲主又集股一節竊擬幹路專歸官辦以一事權枝路留待商股以便招徠路成見利商股自然爭趨枝路較短集股較易總之此事儲鐵宜急勘路宜緩

開工宜遲竣工宜速蓋此舉必待全功既竟大利乃彰
若款尙未籌鐵尙未備急遽從事枝枝節節而爲之此
數年中人但見日日償債處處鳩工未見其利但見其
擾設數年中偶有水旱災祲軍國要用必致謠謗繁興
中作而輟徒糜巨款致棄前功此尤不可不慮者也誠
能量力而舉相時而動此時惟汲汲以開鑛煉鐵爲先
務并令各省將中國所需格致算學化學鑛學諸事加
意講求則無論鐵路之費多費少效速效遲事事注在
養民滴滴歸於中土利源日開漏卮日塞明有強國之
效暗有富民之益此則 聖天子創物利用之宏規斷然

有利而無弊者也以上各節謹就臣管見所及陳其大略其山西平盂澤潞各鐵礦及道路情形臣當一面委員分投詳勘所有一應事宜臣當隨時籌酌會商辦理除先經山東登萊青道盛宣懷由海軍衙門飭令詢商當經電復轉達海署暨疊次與北洋大臣電商外理合恭摺覆奏伏祈聖鑒
硃批該衙門知道欽此

請於羅定州城建福興專祠并請立傳摺

光緒十五年九

月初十日

竊據督辦廣東欽廉防務雲南提督馮子材呈稱原任

綏遠城將軍福興前因患病開缺回旗調理光緒十二年四月初三日在京寓病故欽奉上諭前任綏遠城將軍福興咸豐同治年間從事戎行轉戰廣東廣西湖南湖北奉天等省迭著戰功歷任都統將軍克勤厥職前因患病開缺茲聞溘逝軫惜殊深加恩著照將軍例賜卹任內一切處分悉予開復應得卹典該衙門察例具奏伊孫筆帖式鐵寶著賞給主事分部行走用示篤念蓋臣至意欽此旋蒙賜祭一壇予謚莊愨仰見聖主眷顧勛勤褒卹有加哀榮已極特念子材自效力戎旃卽隸該故將軍部下轉戰兩粵湘鄂江南等省竊見該

故將軍志慮忠誠謀勇兼裕身經百戰屢受重傷其有
功於粵民尤在羅定羅鏡墟一役將積年狂寇聚殲於
一隅不致蔓延爲害實屬有裨大局高州羅定兩屬紳
民感念功德崇報尙虛誼思彌切子材同屬粵民當時
復與其役知之最稔義有不容不爲之陳請者查該故
將軍福興滿州正白旗人姓穆爾察氏道光十五年由
一品廕生補三等侍衛出任直隸懷安路都司洊升參
將經前任直隸總督訥爾經額保舉將才升任直隸督
標中軍副將咸豐元年蒙 文宗顯皇帝特恩擢授廣
東高州鎮總兵來京陛見召見九次赴任高州時值粵

匪披猖逆首凌十八係髮逆洪秀全起事黨魁道光二十九年卽在廣西金田地方拜會倡亂與洪秀全等同惡相濟擾及兩省盤踞羅定州屬之羅鏡墟地方前督臣徐廣縉駐軍信宜剿辦經年前後幾及百戰未能得手該故將軍奉派前往攻剿至則簡士卒廣間諜設方略先將附墟礮壘十餘座一律平燬督率諸軍定計合圍進攻羅鏡身先士卒躍馬入陣飛石傷胸墜地絕而復甦督戰益急卒搗其巢賊魁首凶渠悍黨殲除淨盡旋督粵軍剿平廣西鬱林博白兩屬土匪蒙恩賞戴花翎賞給剛安巴圖魯名號補授廣西提督奉命馳往湖

南軍營協剿咸豐六年奉旨補授西安將軍幫辦向榮
軍務旋奉命赴江西會同曾國藩督辦江西軍務維時
東南事亟劇寇縱橫該故將軍提粵卒不滿五千軍無
見糧以饑疲之眾奔馳大江南北備歷艱險惟以忠義
激勵將士摧鋒陷陣屢奏膚功咸豐五年在江南則克
復高淳縣城及東壩鎮六年解鎮江之圍七年在江西
則解貴溪之圍擊退回犯廣信大股逆匪力遏賊衝八
年赴援浙江踏平衢州油柵地方賊營數十座及城外
堅壘十二處解衢州之圍身受槍彈重傷懇恩賞假在
營調理欽奉寄諭回京當差十年奉旨召見以傷口未

合經軍機大臣代奏蒙恩賞五福拔毒散十一年十一月銷假補授正黃旗漢軍都統同治元年管理神機營事務四年奉旨選帶神機營威遠隊二千名前赴奉天會同故大學士文祥剿辦馬賊督率官軍於中陽堡朝陽坡新河口等處三獲大捷殲斃馬賊無算五年署理盛京將軍派軍分剿馬賊餘黨拏獲匪首馬傻子正法奉省以次肅清奉旨授察哈爾都統旋簡放綏遠城將軍六年以衰病疏請開缺回旗調理該故將軍馭將治軍知人善任拊將領如子弟與士卒同甘苦每能以少擊眾制勝出奇身歿之後家無餘財奄有古名將之風

其任高州鎮時整軍經武紀律嚴明羅鏡地屬羅定界
接高州凌十八竄踞該墟黨眾幾及萬人屢敗官將兩
郡震動該故將軍摧狂寇於方張防狡虜之四逸出奇
制勝聚而殲旃俾高州羅定兩屬得免蹂躪紳民父老
感頌遺澤馨香俎豆之思久而弗忘以子材向在行間
熟悉高羅戰狀兼久隸該故將軍部下審知生平事蹟
各省戰功函屬呈請具奏籲懇天恩准於高州府暨羅
定州城內建立該故將軍專祠以隆報祀並將生平事
蹟宣付史館等情前來臣查已故綏遠城將軍福興忠
勇樸誠勛庸昭著其剿平羅鏡墟之逆匪凌十八實爲

粵逆洪秀全倡亂黨魁粵亂初起洪逆竄踞永安州城亦只一隅之地以攻剿不力該逆竄出湖南遂致流毒海內凌十八竄踞羅鏡負隅抗拒前督臣徐廣縉督剿經年攻之不克該故將軍相機進剿一鼓盪平盡殲醜類恭讀欽定剿平粵匪方略 文宗顯皇帝有掃數殲除深慰朕懷之諭具徵此役戰勝攻取關係至重非僅功在一方前年該故將軍病歿仰蒙寵予易名賞延於世其事功本末久契宸衷既係輿論感頌部將陳情臣未敢壅於上聞相應據情奏明可否仰懇天恩准於高州府羅定州城內由地方捐建已故綏遠城將軍福興

東坡先生集卷二十一
二
專祠並將該故將軍生平事蹟宣付國史館以彰蓋績
出自逾格鴻慈理合恭摺上陳伏祈聖鑒
硃批著照所請該衙門知道欽此

建築瓊廉海口礮臺摺

光緒十五年九月二十日

竊惟瓊州一府孤懸海中逼近越南關鍵中外地方干
里黎山廣深榛莽未啟林木茂美鑛產頗多強敵日伺
垂涎已久蓋自英得香港以來不惟商務殷繁尤於屯
泊修造兵輪爲便泰西各國羣相豔羨於中華洋面諸
島莫不欲探得善地爲開設埠頭停頓兵輪之所是瓊
島一隅在中國則如石田如贅瘤然令他人據之則全

粵不能一日安枕非惟一國之覬覦實爲列邦所屬目
年來測訪洋情參之事勢實已見有端倪仰蒙 聖主
明見萬里采侍郎曾紀澤之奏以該處情形較臺灣尤
爲喫重特頒諭旨令籌經久之計欽服莫名查瓊州離
省過遠限隔大洋若非豫爲籌備完固令其可戰可守
自固藩籬一旦有事無論水陸赴援斷然無及惟是峒
黎叛服不常客匪勾煽爲患疾在腹心遑云外侮近年
剿撫兼施黎客綏靖獷俗略變利源漸開內患旣紓外
防宜鞏減勇練兵因地設險亟應以次遞舉臣前年冬
間因出巡各海口先至瓊州海口親加相度海灘廣闊

敵人巨艦難以駛近然其船礮甚巨足可護其登岸舢板若我之臺礮稍弱則徒受礮而不能擊敵濱海舊有廢礮臺二座修造既未合法地基亦被淹浸當勘得海口城西五里之秀英山土人稱爲水英山地勢最好距敵較近岡阜高廣可以東西兼顧應築臺七座海口城西十里之西場地亦堅實其地亦可登岸應築臺三座每臺各配大礮一尊均二十四生三十五倍口徑長礮始足及遠攻堅海口城後西南之大英山地勢聳出俯瞰海口令城應築臺五座配十五生長礮五尊外洋所爭專重海口埠頭此防敵人萬一登岸屯踞海口有此

巨礮下擊自難立足該山堅實高燥外人久圖侵占民情不願光緒元年至十二年間屢煩筆舌若築有礮臺兼可消患無形其海口城西三里之鹽竈近年建有鎮瓊臺城西一里臨河舊有得勝臺地低沙鬆只可量加修治酌設田雞等礮以資輔助惟瓊州海口形勢海岸平行海灘散漫若敵人用舢板小輪分投伺便登岸更難防遏比年以來熟加諮度惟有沿海堅築礮隄方可有恃今將濱海一帶西自西場起東至牛始舊礮臺止共二十餘里築一堅厚長隄開修礮路通行礮車用以扼擊沿灘入口敵船礮臺遠攻車礮近擊交相爲濟庶

可云以守則固惟隄基甚長海港間阻又須多造堅橋
工程浩大籌辦不易先後飭委雷瓊道朱采署瓊州鎮
總兵李先義履勘復派署北海鎮總兵陶定昇帶同精
於測繪之將弁前往覆勘博采眾論酌定辦法兼以需
款甚鉅年來多方撙節騰挪始得有所藉手現在派委
朱采李先義督辦礮隄工程會同切實估計隄身自西
至東長共五千五百五十九丈有奇高八尺厚二丈隄
牆高四尺一律堅築平坦通行礮車共配七生半車礮
一百零二尊計十七隊操演精熟以備攻擊隄脚遍栽
蘆竹波羅茨護隄當潮以期經久所有隄工橋工及隄

牆栽種筍竹一切需銀七萬餘兩現已刻日興工其臺
工俟礮到再行確估趕速修竣安設此勘估興築瓊州
海口礮隄礮臺及分配臺礮車礮之情形也廉州北海
一口去越甚近敵船自海防來一日可到近接九頭山
又爲海盜之窟宅瓊防而外此爲最亟臣前至北海巡
視冠頭一嶺最爲扼要嶺之左右數峰相倚遠瞰大洋
正對輪船來路前派副將劉幹清監修之礮臺其時海
防緊迫倉卒趕辦雖工程尙爲堅實惟地勢低而臺心
小不能安設大礮迤東平沙廣漠皆可登岸曾與北海
鎮總兵王孝祺商酌廉防不能專恃礮臺必須陸軍礮

隊與礮臺相輔爲用始能得力現擬於冠頭嶺天馬嶺
石龜尾諸山擇要居高築臺五座配二十四生礮五尊
扼擊敵人巨艦廉州平行向可行車其平沙一帶擬練
車礮五隊配八生七車礮三十尊用馬駕運以備敵人
近岸往來馳驟攻擊及援護礮臺之用此又籌議興築
廉州北海礮臺及分配臺礮車礮之情形也計瓊廉礮
臺共十五座瓊州沿海卑濕地基不固築臺須加椿石
北海冠頭嶺因山爲臺又費開鑿之工是瓊廉臺工皆
較尋常工費爲鉅已飭該鎮道俟礮隄築成時接續確
估興辦查前次購定各礮係奏明以肇潮兩稅廠新增

節省防費爲買礮專款訂購十五生長礮五十尊除第一批運到五尊外其餘四十五尊臣權劑緩急配撥瓊廉兩防礮力尙嫌其小於上年電致出使德國大臣洪鈞與克虜伯廠改訂二十四生三十五倍口徑長礮二十尊架件全共配擊鐵甲鋼彈六百顆開花鋼彈一千四百顆鋼子母彈四百顆硬鐵彈一千六百顆引火五十枚裝彈炸藥二萬二千啟羅又額外添配小粒藥九百五十啟羅藥筒一百二十六啟羅專爲新式子母彈之用此項礮價除以從前議定之價相抵仍動支奏定買礮專款外今改訂大礮核計應加七萬餘兩當於沙

田經費項下補足業經籌付半價礮到全清其籌墊之款應於十年專款項下陸續扣還並限定於明年十月全分造齊運粵又訂購七生半車礮一百零二尊有車無鞍三生七車礮三十尊車件配全每礮彈一百顆共價一百四十七萬八千三百五十馬合銀三十七萬餘兩運保費在外現已匯付半價定立合同限十四箇月造齊運粵此項改訂之二十四生長礮二十尊計撥瓊防十尊廉防五尊尙餘五尊留爲省防橫擋沙角等處之用其潮防汕頭地方前奏明應於口門之澳頭馬仔馬嶼三處添築礮臺安礮十尊其地防禦較緩所訂之

礮今已改撥瓊防應俟潮州新丈沙田經費今年冬底
即可收有成數當照案買足布置至新收之白龍尾地
方亦爲緊要前遵旨將設官分汛事宜籌定舉辦並奏
明應築礮臺四五座以資控扼查該處海港內通欽州
防城實爲欽防之門戶臣前此巡視率同提督蔡金章
等詳加審度定於近內較高之山建設礮臺五處現將
省防撤出之四頓重以上克虜伯鋼礮五尊撥發該處
應用委署北海鎮總兵陶定昇前往勘估臺工督同馮
子材所部將弁修造大抵外洋性情無時不思進步無
事不伏暗著東西兩粵沿海沿邊眈眈無已若我已明

有征繕之備則彼自陰消其覬覦之心此臣所以不敢苟幸目前之無事而必汲汲竭蹶以圖之者也所有建築瓊廉海口礮臺礮隄改訂大礮訂購車礮各緣由咨呈海軍衙門暨咨戶兵二部外理合恭摺具陳再瓊廉防務必須礮臺礮隊相輔爲用應行籌辦各事宜分案奏陳曾經臣於光緒十三年十一月奏明在案此次添配臺礮車礮係遵照從前奏案辦理是以未經咨商海軍衙門理合陳明

上諭張之洞奏建築瓊廉海口礮臺以固防局一摺覽奏均悉各省築臺購礮等事均應先期咨商海軍衙門

議定有案方准興修前經該衙門奏准通飭遵照瓊廉防務張之洞前於巡視海口摺內奏明興辦惟係統陳大概情形並未將築臺若干購礮若干先行咨商海軍衙門籌定請旨現在閱時已久始將購礮築臺各節一一陳奏均係動用鉅款率行定議殊屬不合張之洞著傳旨申飭所奏瓊廉等處現辦各事宜均著該衙門議奏欽此

查勘榆林港形勢籌議駐營築臺片

光緒十五年九月二十日

再據署瓊州鎮總兵李先義代理雷瓊道顧元勳署崖州知州唐鏡沅等稟稱本年七月初三日有法國兵輪

駛進崖東百里之榆林港沿港量水由港西上岸釘椿
四處港口有石椿均用灰塗東西兩岸分插紅白四小
旗十七日復來插標十五處有海關巡船遇見等情當
電飭瓊關稅司查覆旋據復稱該關名開辦之巡船在
榆林港相遇詢其何事據稱到瓊島西南測量水道查
瓊州除海口而外皆非通商口岸法船何得入港量水
上岸釘椿插標非特顯背條約實屬包藏禍心除飭將
各椿標撤毀並照會法領事嚴切禁阻暨電達總理各
國事務衙門詰問法使外當卽派李先義帶同精於測
繪將弁數員乘駕兵輪前往榆林港測量查勘去後茲

據該鎮及各將弁稟稱勘得榆林港兩山環抱水口緊而且深形如葫蘆口門內水深港闊可泊鐵甲大船十餘艘中號兵輪二三十艘各山林木叢雜泉水甚甘周圍十餘里土人及來往舢板皆往取水如海防有事紮水寨爲營形勢之勝不獨爲瓊海他口所無卽廣東通省各海島亦所罕覲查瓊州海面七洲洋一帶風浪最惡無可停泊若將此港籌備完密設瓊海有事我之鐵艦與敵艦攻擊之時倘值風暴不便得此可資收泊又有礮臺以爲犄角實爲講求海軍必爭之地等情繪圖貼說稟請核辦前來臣查法人窺伺瓊州已非一日此

次在榆林港量水插標狡謀顯露該港水深能泊鐵艦並可取水避風若不幸爲敵所據兵輪中道停泊有所豈惟瓊州一府之憂將南洋各口胥被其害方今環瀛各國眈眈羣伺此港旣爲形勢之區牖戶綢繆自應亟圖豫防之計現擬於榆林港口門外東山樂道嶺西山獨田嶺分築礮臺各三座兩岸相距二百餘丈敵船若欲進口中等礮力儘可摧堅若配十五生新式長礮六尊足資扼守惟該港經營必須及早築臺尙可從容現經雷瓊道朱采調派一營前往駐紮令其覆加體察一俟定議卽行籌款購礮興工

硃批該衙門議奏欽此

捐建瓊州昭忠祠摺

光緒十五年九月二十日

竊照瓊州黎客各匪踞巢負固糾眾殺掠孽牙蔓衍三十餘年殘害地方爲患日亟自光緒十二年八月奏明大舉澈辦剿撫兼施數年以來鉅患克紓庶務畢舉良民安業黎峒樂生在事文武員弁艱苦備嘗陣亡瘡故纍纍不絕計兩次奏卹道員楊玉書總兵易榮華等共三百六十二員其各營兵勇應彙案咨部議卹者復有一千數百名之多查瓊州黎峒寒暖不時瘴癘尤毒各該員弁等擣穴擒渠馴生闢土通道安甯建學設墟以

及招商伐木墾田開鑛等務靡不踰越險阻窮極幽深
出入鋒鏑蒙犯霧露朝病夕故九死一生往往未邀獎
敘之恩遽已殞身瘴域乃前者僵踣後者繼進奮發不
悔退避毫無跡其矢志報國致命捐軀瘴海忠魂實堪
矜憫先後准督辦欽廉防務雲南提督馮子材函咨並
據雷州道朱采等稟稱各該員弁等有功於民以死勤
事軍民感戴將吏同欽旣邀朝廷賜卹之恩應體盛世
褒忠之典建祠報祀於禮攸宜竊擬籌捐集款於瓊州
府城購地創建昭忠祠合祀此次剿撫黎客瘴故賜卹
之三品銜山西候補道楊玉書及一應在事陣亡瘴故

曾經奏卹之員弁兵勇紳團懇請具奏前來合無仰懇
天恩俯准列入祀典飭地方官春秋致祭以慰羣情而
勵效命

硃批著照所請該部知道欽此

籌定廣西邊防摺

光緒十五年九月二十日

竊維廣西邊防重在鎮南關向時通道往來祇由文淵
州一路可入內地雖有別隘封禁甚嚴自和約告成南
關通商此外平而水口兩關亦條約載明通商之路歧
中有歧防不勝防經臣屢商廣西提督臣蘇元春隨時
體察妥籌布置迭據報稱法人在越南地方擬開鐵路

由海甯出峒中那陽以達諒山復由文淵扣波至龍州平而關外之白欖村在彼屯貨以便商運從前商販舊路係由文淵進南關至樟村登船路約百里今改此道由文淵扣波緣邊行走至平而關之上登船路亦百里而可繞避鎮南關前各隘且勢據龍州上南關轉居其後無事則轉運商貨行銷廣西雲貴可避各處稅釐有事則轉運兵餉亦極便捷等情臣察法人狡謀避險深懷叵測未可因款議新成稍弛戒備疊與蘇元春往來電商以電音簡略未能曲暢所言該提督擬來東就商邊務經臣電請總理各國事務衙門代奏奉旨允准當

卽恭錄轉電去後茲該提督於七月二十四日到東據稱中外邊地處處接壤揆度形勢必須於平而關增置礮臺以備防守前飭副將楊昌魁駐營該處密切查勘應築臺者四處北岸則平而汎對過之嶺頂並距數里之底隘各築一臺南岸則距汎二里許之平公嶺并巴口隘右嶺各築一臺四處均土山可爲暗臺經該提督親勘洵屬扼要又彬橋先築之各臺亦須修築其平公嶺等處尙須設營應隨時酌量抽調各等情查法人開鑿新路繞出南關其爲力爭上游蓄意深入已可概見自不得不置臺設備以爲之防且鎮南關中路一帶舊

日布置之礮尙不敷用亦須酌增數臺以臻完密惟龍州一帶地多山嶺此專爲防敵人之陸路步隊及水路小船不比扼海攻堅無須甚大之礮且由梧江歷灘湖流上至龍州大礮亦難挽運茲經臣與蘇元春壽商共應添新式十二生三十五倍口徑長礮二十尊各配彈一百顆由東省代爲訂購運至龍州由蘇元春酌量布置約須銀十八萬餘兩運保費在外其價由廣東陸續墊付卽在廣西協餉項下分作三年扣還每年扣銀五萬計尙不敷三萬容俟臣抵鄂後竭力籌措於每年實協桂餉之數加解一萬以裨防局運費保險若干再由

協餉續扣查東省每年應解西省協餉十二萬兩近年
籌解之數除撥抵各項墊款外大率每年解西現銀均
在十萬八萬之間計此後三年內每年仍當實解西餉
銀七萬兩西省較前僅歲少銀二三萬兩若將邊防各
勇暫裁一營即可省出二萬餘金減隨時可添之勇置
經久有用之礮實爲籌邊至計臣復囑該提督前往虎
門等處閱看所有礮臺工程式樣及布置情形以便仿
照辦理該提督閱看後卽於八月十六日起程由梧州
水道回防合併陳明
硃批該衙門議奏欽此

裁革州縣規費各項加給公費津貼摺

光緒十五年十月十

二日

竊惟察吏之本首在清廉爲政之方貴乎平恕從古未有不恤民而能言治者亦未有不恤吏而能恤民者廣東仕宦素有豐廩之名其實州縣優缺本屬無多自同治六七兩年裁減各州縣米羨每年計銀三十餘萬兩進款頓少而司庫派解之捐攤各款道府之節壽陋規各上司衙門之水禮門包辦差雜費一切如故州縣計無復之若非飭法鬻獄卽是虧欠庫款大率大缺則擾累無底小缺則窮困無聊強黠者則以貪墨敗檢名玷

摺紳庸闇者則以虧空獲罪全家流落苟非操行十分耿介罕有能自全者其中豈必盡甘暴棄一經絀累不克自拔爲人材計亦甚可閔可惜夫上司誅求無厭而責屬員之貪黷是謂無理上下互相挾制互相徇隱聽其虧帑虐民是謂無政其究仍歸於國計民生交受其害而已臣前在山西巡撫任內奏明將通省陋規全裁改給公費并將各屬攤捐全行籌免籌款抵補各屬稱便光緒十年來粵後卽考知此間積弊徒以海防虧累以及各國交涉事體急迫紛紜加以水災匪鄉籌餉善後等事統籌兼顧物力日力皆有不給且積重已久非

澈底查清亦難輕舉惟有先於省城端其本源示之表率除臣實署兩衙門所有饋遺雜費於到任日卽已一律禁絕外司道衙門亦經嚴行戒禁於屬吏之或優或劣隨事示以勸懲自高崇基爲藩司于蔭霖爲臬司相助爲理力懲貪風習爲儉約粵省風氣爲之一變省外屬吏頗不乏聞風興感者隨於光緒十三年爲瓊州道府籌足公費將陋規一律裁禁上年秋冬間臣再兼撫篆責任較專當飭藩司將各屬公私出入各款逐一詳查竭數月之力始得一一呈露茲經臣督同兩司悉心籌議必欲爲廣東州縣永除鉅累廣東吏治清其本源

一規禮宜革一捐攤宜裁一辦差浮費宜省一例差宜少派一道府公費宜籌發一州縣苦缺宜津貼查陋規一項相沿已久本非道府所樂爲特以辦公無資不免襲常蹈故謹飭者聽其自然量從寬簡鄙俗者斤斤計較表率難言其名目亦甚猥雜如節壽到任禮季規月費油米柴炭客案修金盤查倉庫費秋審費到任水禮過山禮乾脩修署門包共十四款或此有彼無或大同小異應卽一律禁革不准別立名目需索巧取其有必不能省之公務供支各款雖難全無應照先時裁減一半又查捐攤一項乃本省需用而不能開銷者於是派

之府廳州縣此百餘年各省相沿之痼習大缺在二千金內外小缺亦在二百金內外屬吏之力既不能堪於是百計宕欠其應解司庫者或始終懸欠任扣養廉或設法抵兌利歸胥吏其歷任流攤者久成虛濫徒於交代案內多費筆墨延誤例限計藩司衙門凡十二款曰香蠟差費高錫差費小書工食憲書三成綏徭廳練勇經費徭目口糧餉差盤費清查無著擬款報資塘兵餉不敷火藥價草鳥船經費臬司衙門凡三款曰驛傳房紙劄飯食傳供飯食司監加增藥餌以上各款概行裁免其有向需支發之項約歲需銀二萬餘兩由司局另

籌閒款動支抵補以後道府廳州縣各員養廉除自行稟請留抵部款外均發現銀不准扣抵至捐解道府衙門各款除向係實解公用者其所解多寡之數各仍其舊凡無名之款或有捐無解之虛款及流攤數目一概全裁亦不准再將新款稟請起攤其學政歲科兩試考棚經費往來夫船勿爲州縣藉詞虧累之端除棚規本屬各省通行多年舊章自應循舊辦理此外考棚辦差雜費爲數實繁學臣樊恭煦持廉恤吏深知治體與臣會商酌定一律裁減三成並令司局道府不得將候委人員無故多委例差以省擾累此分別禁革規禮裁免

捐攤核減差費之辦法也規禮既裁各道府中如督糧道南韶連道廣州肇慶潮州廉州等府或向有奏定公費或向有關稅盈餘支用尙充其餘道府減成廉俸於辦公實有不敷必應籌給公費學政按試各屬隨棚募丁吏役人數較多並爲隨棚人役酌籌出差津貼皆係所給之數稍贏於所裁之數其承辦考試各州縣暨最爲瘠苦之鎮平平遠感恩昌化四縣亦酌加津貼以資辦公而免藉口計抵攤公費差費津貼四項通年共需銀七萬七千餘兩卽於誠信敬忠兩堂商人捐款項下動支此係由外新籌之款與司局各正款無涉以之爲

恤吏戒貪之用似屬相宜此籌給公費津貼之辦法也
似此分別釐正積弊一清道府既充然有餘州縣亦脫
然無累有餘則有以正色率下無累則可以勉爲循良
倘道府仍巧取於下牧令仍轉剝於民以及侵挪錢糧
甘受賄賂兩司不難詳參道府不難稟揭從嚴懲處亦
復何辭從此官無重累民無虐政庫無虧款廣東吏治
民生可日臻上理矣

硃批該部知道欽此

核定州縣錢糧表目片

光緒十五年十月十二日

再州縣徵收錢糧例應隨時報解乃廣東省各屬習成

疲玩每屆奏銷遲逾六七箇月始行造辦已歷多年不肖之員藉此挪移延不報解其廉謹者亦復視爲泛常虧短之弊因之而起殊不思報解遲延在各州縣非不暫覺從容惟縱弛既慣積成虧空日後必深受其累皆寬縱之上司有以誤之也欲除此弊惟有嚴核徵存早催報解臣前兼署巡撫時卽仿照鹽務辦法督同藩司通飭各屬勒限徵解嚴定功過自光緒十二年爲始每屆奏銷趲早一箇月辦理以期規復舊制經於上年會同前撫臣吳大澂附片奏明在案臣猶恐各牧令狃於積習藩司眩於紛繁待至事後參追於庫帑仍無實濟

必得一簡明格式豫籌早催然後上有所稽下有所守
及再兼撫篆因復詳加考核定一格式名爲各州縣錢
糧新舊徵解完欠表共兩葉其前一葉爲表目將該處
額徵額解正雜錢糧銀米等項數目逐款明晰填注次
一葉爲每月完欠表將此月徵收某項若干報解若干
坐支若干尙欠若干據實填注兩葉黏訂相連均於月
底截數限次月初三日稟繳督撫司道及本管府州查
核不准遺漏各上司將每一州縣按月所報接續訂成
一冊儻有徵存未解或徵多報少上司卽可隨時指款
嚴提如有不按月造報卽予撤任停委如此辦理目前

雖有不便通融之苦日後自有脫然無累之樂新章既嚴其一切浮費應酌亦可藉以拒絕豈獨庫款無虧吏治亦必有起色既經通飭照辦去後各州縣知臣於嚴核之中寓以矜全尙能奮勉趕解本年應辦十四年奏銷業已趲早兩箇月於八月內辦竣具題以後藩司如果遵照程式認真考核隨時督催再過一年則廣東奏銷即可復舊章例限虧空亦當漸稀所以裨益庫款保全州縣者實屬不少

硃批戶部知道欽此

張文襄公全集卷二十七終

紹興孫家棟校

張文襄公全集卷二十八

奏議二十八

進呈粵海圖說摺

光緒十五年十月十二日

竊臣前經承准總理各國事務衙門來電奉旨著將沿海各口地形繪圖貼說並將某營現紮某口兵勇若干何人管帶有無礮臺分別詳細注寫以備考證等因欽此嗣准咨同前由合遵奉諭旨督飭所司繪刊簡明圖說毋漏毋枝進呈乙覽並咨送軍機處及總署各一份以備稽核等因當經分別恭錄咨行欽遵辦理在案查廣東爲南洋首衝近連港澳遠控越南沿海各口迴環

廣袤四千餘里內河外海暗礁明島叢雜林立必欲測繪精密考核詳明斷非旦夕所能集事當於光緒十二年設立海圖館派委戶部主事趙濱彥廣西候補道方長華等督飭通曉算法輿地之學生員弁等分赴各海口疊次履勘詳確測繪派候選道蔡錫勇在館總司其事區分廣州市防潮防廉防瓊防爲四路約舉極衝次衝又次衝爲三等就各路所繪草圖所錄條記覆加匯合繪爲總圖分圖詳爲之說所有經費支銷各款均已明晰奏咨立案各該員生等出入風濤無間寒暑候潮汐測沙礁辨島嶼凡輪帆可達之處戰守緩急之宜靡

不周歷審視反覆推求兼以勇營調撥不常礮臺逐漸增築均須隨時添纂改訂自光緒十二年正月開辦起截至十三年七月歲事臣於是年冬間乘輪巡海隨帶測繪員生親歷四路復就所繪各圖詳加核正裁定義例令內閣中書楊銳刪除繁蕪鈎提綱要定爲圖說一卷大要以當務切用爲主故畧於前事詳於近事畧於山川詳於阨塞凡圖中極衝次衝又次衝均爲之說若輪船所不到守備所不及之處皆從其畧共爲總圖五廣東全省海口總圖一四路海口總圖一分圖九中路廣州市防分圖六東路潮防西路廉防南路瓊防分圖

各一圖說一本裝潢成帙恭呈御覽

硃批知道了圖留覽欽此

辦理水陸師學堂情形摺

光緒十五年十月十八日

竊臣於光緒十三年六月會同撫臣吳大澂奏請水陸師學堂籌建堂舍酌定課程並調熟習大員總辦專摺奏陳在案當於黃浦長洲地方舊日博學館原有房屋甄選學生調派教習暨各委員購買書籍儀器先行開辦一面卽就左近勘購田地四十七畝有奇價銀四千五百九十二兩就地建造新學堂一座計正中一路前後五院內有樓者三院以作講堂及委員教習住房左

右兩路前後各四院均屬上下樓房以作學生住房後院小房平列者三院以爲廚竈茶房浴房暨丁役住房凡爲院一十有六爲房一百八十有六而每院之左右廂廊正中路亭之屬不計焉堂外別建機器廠一座鑄鐵廠一座附廠煙囪一座儲料所打鐵廠匠丁住房大小共七間又建操廠一座操場一區演武廳一座帥臺一座操場水溝三道前後圍牆一周堂前石隄一帶洋木馬頭一座共支工料銀五萬九千二百餘兩較之原奏估銀六萬兩之數尙屬有減無增各項工程業已次第完竣工料均屬堅實規模亦頗壯闊計機器廠內應

設十二匹馬力汽機鍋爐全座並大小鍛鐵床鑽鐵機
削鐵床剪鐵機一十七架暨手用器具銅鐵鋼料約共
英金二千五百鎊此項機器亦已由英購致此學堂購
地鳩工大畧情形也其學生係於博學館原有七十餘
名派令分習駕駛管輪諸學比年厯經考察其器識
資質體氣之不如式者陸續剔退十有餘名現存三十
八名十四年五月由天津調致會充行伍膽力素優之
武職員弁二十名經派令專習陸師諸學十五年八月
復由福建船政後學堂調致曾經在堂三四年之水師
學生三十七名以其在閩原屬分習駕駛管輪而入堂

先後不等察其造詣深淺或另列一班或量與博學館舊生分別併班入堂受課本年九月又由天津招致曾經讀書能文幼童二十名以其初入學堂權令學習英文算學以爲初基將來酌配水師陸師仍專一藝此連年先後入堂學生分派學習大畧情形也博學館舊有房舍無多委員教習暨各學生皆併屋而居講堂亦不敷分布現在新堂旣成自應分別居住新堂大倍舊堂卽以分居駕駛管輪兩項學生而以舊堂專居陸師學生其委員教習亦各視所職分配兩堂俾約束教導咸有專責兩堂經費原奏每月約需銀五千兩查當時係

籌先行開辦駕駛陸師兩項其管輪一項因經費最鉅但籌兼習之法是以水師陸師學生各祇額設七十名今則管輪駕駛陸師三項同時並舉管輪亦額設學生七十名共額設二百一十名又增建管輪機器廠一座廠內匠丁料件一一有費則按月所需自較原估增鉅而自開辦以來臣督飭在堂各員凡百力求撙節現在按月所支華洋教習委員薪費學生膏火茶飯丁役工食暨各項雜費率皆不過三千兩左右以此逆計將來學生招足二百一十名之額並添派教習除練船經費及堂內隨時值有添置大宗儀器書籍文具畫具仍照

章另案領款造銷外兩堂每月常川用費度仍不越五千餘金實屬初估意願之所不及此新舊兩堂分別布置及堂內按月常川經費大畧情形也至於水師學生所需練船擬卽以廣甲輪船充用委派儘先副將劉恩榮爲練船總管船政學生拔補千總陳璧光爲練船副總管船內應設練船正洋教習一員槍礮洋教習一員帆纜洋教習一員均已電致使英大臣劉瑞芬代爲募訂其該船應行分配器具修改帆桅艙位學生應帶上船之儀器書籍號衣帽靴之屬均經分別製辦查水師之有練船所以與學堂相輔而行學生在堂旣備習水

師諸學之理派登練船乃以使卽平時在堂所學者一徵諸實踐以備嫻其法此次設立練船擬以三年爲限三年之中擬分六次出洋俾周歷中國沿海口岸島澳及附近南洋東洋各國口岸從前閩廠練船全年薪糧雜費約共支銀六萬餘兩此次所擬練船員弁名額薪糧之可得而計者每月約共支銀二千六百餘兩其煤炭引水華洋紙筆隨時添置一切雜費無從懸揣應令總管練船官撙節動支核實造銷然約計一歲薪糧雜費兩項所需大約當四萬兩左右較諸閩廠練船成案歲可省銀約二萬兩而一切規模仍臻全備此籌辦

練船並約估練船經費大略情形也查學堂開辦以來已逾二年有奇駕駛頭班學生一十四名在堂應授諸學業已次第畢業年內可以派登練船其陸師頭班學生十九名亦已學成堪以派赴各營供差在事各員不無微勞足錄學生之厯考優等者亦不乏堪期造就之材查從先天津武備學堂水師學堂著有成效先後經北洋大臣李鴻章奏請將在事出力之委員教習暨優等學生援照總理衙門同文館成案二年奏保一次奉旨著照所請該衙門知道欽此經吏部核奏以查所保既據奏准有案應照異常勞績給獎嗣後二年保獎一

次卽以現在所保人數爲定額再此次事屬創始是以按異常勞績給獎下屆二年期滿保獎擬請照尋常勞績核辦以示區別等因具奏奉旨依議欽此欽遵在案現在廣東創設水陸師學堂已逾二年著有成效與天津水師武備兩堂事同一律合無仰懇天恩俯准將在堂出力之委員教習暨優等學生照北洋成案初次按異常勞績保獎俾在事者益奮勉以圖功願學者更聞風而興起如蒙俞允當由新任督撫臣擇尤奏請獎勵嗣後每屆二年期滿仍照尋常勞績保獎至天津武備水師兩堂係屬分案保獎員額自爲較少現在粵堂係

水師陸師併案請獎堂內委員教習暨各班學生額均較多將來應獎員額自必倍於津堂一案所獎之數俾免或抱向隅

殊批著照所請該衙門知道欽此

增設洋務五學片

光緒十五年十月十八日

再近來萬國輻湊風氣日開其溺於西人之說喜新攻異者固當深戒然其確有實用者亦不能不旁收博采以濟時需查西學門類繁多除算學曩多兼通外有礦學化學電學植物學公法學五種皆足以資自強而裨交涉查外國以開鑛爲富國首務以中國地產至蕃而

銅鐵鉛煤之屬多從洋購其招商開鑛者擇之不精取之不盡理之又不得其人往往虧本無效視爲畏途將來鐵路創興用鐵益廣輪船日富用煤益多縱一時未能遠銷外國總當使中國之材足供中國之用此鑛學宜講也提煉五金精造軍火制作百貨皆由化學而出今各省開局製造之事甚繁而物料之涉於化學不能自製自修者仍必取資外洋且不通其理則必不盡其用此化學宜講也電之爲用若電綫電燈電發雷礮之屬最裨軍政今各省用電之事甚多而生電之機發電之氣製電之藥亦皆仰給外洋此電學宜講也聖人教

民樹藝後世抑爲農家西人竊其緒餘而推闡之遂立植物一學析其物類性質辨其水土宜忌勒爲成書天時之窮濟以人力人力之窮輔以機器於是國無棄地地無遺力農桑爲生民之本業方今生齒日多災沴時有豈可不亟爲經營此植物之學宜講也泰西各國以邦交而立公法獨與中國交涉恆以意要挾舍公法而不用中國亦乏深諳公法能據之以爭者又凡華民至外洋者彼得以其國之律按之而洋人至中土者我不得以中國之法繩之積久成憤終滋事端夫中外之律用意各殊中國案件命盜爲先而財產次之泰西立國

畸重商務故其律法於凡涉財產之事論辯獨詳及其
按律科罪五刑之用輕重之等彼此亦或異施誠宜申
明中國律條參以泰西公法稽其異同輕重衷諸情理
至當著爲通商律例商之各國頒示中外如有交涉事
出無論華民及各國之人在中土者咸以此律爲斷庶
臨事有所依據不致偏枯顧欲爲斯舉非得深諳中外
律法之人不可此公法之學宜講也凡此數端皆爲有
益自彊之務今粵省旣設水陸師學堂以儲武備人材
則此數種學藝亦應及時講習以期相輔而行臣已電
致出使英國大臣劉瑞芬分別募致鑛學化學電學植

物學公法學五種洋教習各一員來粵教授水陸師學
堂屋宇寬廠應卽令新立五學附設其中此項學生擬
各以三十名爲額五項共額設一百五十名惟鑛學公
法兩項人員在其國皆食優俸募作教習薪費必倍尋
常凡習公法者於精通該國語文以後尙須兼習希臘
臘丁二國語文則此項學生未便以新招者當之以致
糜費多而收效遲現由閩廠酌調已通英國語文及各
項算學之上等學生五六十名更就上海廣方言館及
廣東同文館考校錄取以充斯選可期事半功倍除應
行拓建堂舍購置各項書籍儀器畫具文具藥料之屬

暨按月所需經費悉由總辦水陸師學堂道員吳仲翔等分別籌計另案咨部外所有增設洋務五學情形謹附片具陳伏祈聖鑒

硃批該衙門知道欽此

續造兵輪片

光緒十五年十月十八日

再廣東船局製成廣戊兵輪一艘業於光緒十三年十一月間附片奏明在案十四年四月間廣己一艘亦經完竣試洋察看船身機器卽駛行速率均屬及格與廣戊大略相同經臣先後遴員管帶分駐巡防嗣因惠潮高廉一帶海面尙在需輪而該局歲修各船工作多暇

曠廢可惜所有委員工匠等必須日有所事庶可講求精純當飭接續起製鐵脅鋼舢鋼壳雙桅兵輪經總辦船局分省補用道王葆辰幫辦廣東試用知府熊方柏遴選船局差遣軍功黃福華繪具圖說飭令承造計船長英尺一百五十尺寬二十三尺喫水極深十尺配康邦新式卧機馬力五百匹船前耳臺擬安十二生礮兩尊船後擬安十一生礮一尊中桅上擬安五管荷乞開士聯珠礮一尊以能出大洋爲度每半時約行三十三中里礮價在外估計全船工料銀五萬七千餘兩擬共造兩艘一名廣金備欽州海面常川巡防之用一名廣

玉備瓊州海面常川巡防之用廣金於本年六月間開
造茲於本月安上鐵板龍骨限明年春間一律工竣試
洋一面添調閩廠出洋藝成學生候選知縣鄭成候選
縣丞曾宗瀛兩員到工常川測量較定以臻精密臣查
粵廠船工不比他省鉅廠所籌者零星之捐款所用者
土著之工匠銳意發端冥思創造只如椎輪大輅小試
其端今由木壳漸製鐵壳由淺水漸駛大海風氣可望
日開該局總辦王葆辰熊方柏等精勤詳實熟習竅要
考求督察不憚煩勞洵屬殫心出力有裨實用所需經
費仍係照案外籌捐辦應請敕部查照奏准戊己兩艘

成案免其造冊報銷至閩廠協造各艘節次准船政大臣裴蔭森電咨廣庚一艘已於本月上旬造竣經臣遴委都司張斌酌帶舵手人等赴閩接帶日內即可回粵派撥巡洋其廣乙一艘業經下水年底亦可竣工硃批該衙門知道欽此

請錄用姚覲元摺

光緒十五年十月十八日

竊臣欽奉本年三月十六日恭上 慈禧端佑康頤昭豫莊誠壽恭欽獻皇太后徽號恩詔應行事宜內開自同治元年以來曾經任用現已革職官員若有事係冤枉被革果有才力堪用者在京聽該衙門在外聽該督

別集卷之二十一
撫查明詳開緣由奏明請旨等因欽此欽遵仰見 聖
主行慶推恩甄錄廢棄愛惜人才之至意茲查有已革
廣東布政使姚觀元前經大學士閻敬銘在戶部尙書
任內奏參監司大員前戶部司官聲名貪劣羣議沸騰
請予罷斥奉旨廣東布政使姚觀元湖北荊宜施道董
雋翰湖北候補道楊鴻典均著革職卽行回籍等因欽
此查該革員以戶部郎中蒙恩簡授川東道初膺外任
卽有政聲時臣視學四川按試所至深知該革員操守
廉謹從不向所屬府縣苛索陋規眾論皆同臣甚器其
爲人洎升任湖北按察使到鄂未久卽署理湖北藩司

綜核名實獎廉懲貪爲前督撫臣所倚任迨擢粵藩該
革員感激恩遇益加奮勉開辦沙田升科事宜整頓通
省釐務條理精密均有成效可紀治事之暇時以刊刻
經籍培植士類爲務故所在常存去後之思該革員歷
仕三省臣考之輿論按之所見所聞實未見有貪劣之
蹟推求其故緣同治年間戶部司官不免多招物議外
人徒見該員同係部中出色屢當要差之員遂致一例
譏彈不加詳考區別閤敬銘嫉惡素嚴其再入都門離
京已久曹司近事自難詳知不過采諸人言遂致彙登
白簡跡其所爲委無病國妨民之實蹟該革員現在僑

寓江蘇省城精力甚爲強健並無厚產鉅資果係貧劣之員久任農部厯綰藩條不應如此綜其操守謹飭才幹優長練習度支博通掌故實爲今日切實有用之才若任令廢棄實爲可惜似當期以後效俾其效用國家相應奏明請旨可否量加錄用之處恭候聖裁臣現在奉命會辦鐵路事宜造端閎遠雖舉事不求速效而論功期在必成所有采鐵煉鐵勘路等事均須預爲布置鄂省現患水災民情浮動尤須熟習情形之大員贊畫一切微臣始得有所藉手該革員如蒙俞允起用可否仰懇天恩將該革員發往湖北交臣差遣委用以收指

臂之助出自逾格鴻慈謹恭摺具陳伏祈聖鑒訓示
旨留中欽此

密薦人才片

光緒十五年十月十八日

再爲治以得人爲要臣嶺表五年考察僚屬聽言觀行
或敏於才或篤於守隨宜器使尙不乏人惟求其才識
俱卓爲守兼優足以儲爲大用者僅得二員爲廣東雷
瓊道朱采署潮州府知府羅定直隸州知州曾紀渠查
朱采曾任山西汾州府操行廉正卓著循聲蒙恩簡授
雷瓊道該員到任之始黎客甫靖伏莽未清督率勇營
勦平五弓七弓等處匪徒全瓊肅清籌辦善後凡撫黎

通道治盜遣勇建學設墟招商開鑛伐木墾田諸務爲人所不肯爲不能爲者該員苦心經營次第畢舉現在嶺門凡陽南豐一帶黎峒新開之路牛車暢行墟市數十處煙火相接耕鑿日盛商賈懋遷黎歧嚮化無刦掠之案有弦誦之聲近復裁勇練兵籌築海口礮隄礮臺盡牖戶綢繆之計杜強鄰窺伺之謀其才守風力洵足獨當一面羅定州知州曾紀渠前任連州知州卽有惠政曾經光祿寺卿馮爾昌保薦人才奉旨交軍機處存記臣審知其人於該員到粵後卽委辦緝務非種必鋤不畏疆禦歷任南雄羅定兩州均屬頌聲載道遠近流

傳現署潮州府事潮州號稱難治從前匪鄉近復萌動
時有械鬪之案強紳倚勢官吏無權該員到任以來整
肅紀綱杜絕請託所屬要案皆親提審訊判斷明決抑
強扶弱剔弊除奸今夏潮屬大水嘉應直隸州水灾尤
重該員不分畛域竭力代籌多方賑濟境內境外民無
流亡該員年壯氣盛往往面折人非而整頓地方駕馭
紳士復能通達權變操縱咸宜肆應之才剛果之操兼
而有之時事多艱人材難得該二員志趣器幹迥異俗
吏之所爲皆係實蹟昭著若蒙聖明破格擢用假以事
權必能展其才猷有裨大局敢信其決不至蹈庸鄙因

張之洞集 卷二十一
循之譏臣爲時局需才起見謹附片密陳以備朝廷采
擇

硃批朱采會紀渠均著交軍機處存記欽此

密薦將才片

光緒十五年十月十八日

再署理廣西柳慶鎮總兵慶遠協副將記名總兵董履
高智勇深沉勛勤卓著同治元年投効淮軍克復常熟
昭文兩縣首先登城以六品軍功奏保守備管帶江蘇
撫標親兵中營疊復江陰無錫金匱等縣城勦平東西
捻匪均與其役浔保總兵光緒五年前督臣張樹聲任
廣西巡撫奏調差委勦平思恩謀逆匪首莫夢弼全股

十年奉調出關統帶五營適當邊軍潰退強寇方張該
總兵遏紮前敵屯梅法人大股來犯以孤軍血戰五晝
夜糧盡援絕士卒夷傷大半該總兵左骹亦爲槍彈擊
斷法遂攻谷松陷諒山直叩南關臣於保關克諒摺內
會將情形奏明在案當時軍中不乏驍將設令調度得
宜使爲該總兵後繼強敵當不致鴟張若此該總兵傷
重經年未愈經臣調東醫治爲之多訪良醫內外兼治
始就痊可左足猶有微跛奏署柳慶鎮總兵經畫改撥
營汛事宜井井有條軍民翕服該總兵厚重有體可任
大事在將領中尤爲難得以該員之忠勇苦戰眾論交

推以後如蒙聖恩優加拔擢邊關將士必更當觀感奮興似與邊防武備不無裨益臣歷年與聞邊防備知戰狀今將去粵不敢不詳切瀝陳可否存記以備簡用之處伏候聖裁

硃批董履高已簡放廣西左江鎮矣欽此

參革劣紳摺

光緒十五年十月十八日

竊粵省沙田向爲豪紳利藪每一沙一圍之中必舉有力者爲之首事倡立名目藉爲把持計通省沙田以香山東莞順德爲最多而此等風氣亦惟該三縣爲最甚光緒十二年間順德縣大南沙一案何太英等恃勢勒

賄庇匪藐法經臣據實奏參仰蒙聖明懲辦在案查東莞沙田以萬頃沙一圍爲大宗計田三百數十頃該縣紳士倡立明倫堂名目築圍收租其中有官築屯田該紳等承佃繳租者亦有官屯變價該紳等繳價承領者又有向爲民業該紳等出價買受者甚至恃勢抑價強買佔耕者亦復有之亦有民間田畝投託該紳等代爲出名使佃戶不敢違抗他人不敢與爭統名之曰明倫堂沙田而其實並非一致必舉三五劣紳素能魚肉鄉里人所畏懼者管理其事該紳等從中侵蝕無所不爲假一縣學校之名以挾制官長恐喝鄉黨而其中不過

三數紳士藉以爲漁利之資此等情形卽粵人亦所深
悉臣蒞任以來亦有所聞徒以事未發覺姑示含容不
爲已甚此萬頃沙田豪紳假名漁利之實在情形也嗣
本年夏間疊據沙田局稟稱東莞明倫堂紳局承種之
萬頃沙圍中共計三百餘頃內有田一百三十餘頃乃
係官變價該紳等承領三十餘年應繳屯價花息一十
八萬餘兩僅繳過銀三萬兩其餘所欠甚鉅延不繳完
稟請嚴催當經臣飭催速繳該紳等置若罔聞其意視
官之催迫爲具文以已之延欠爲本分臣因該紳等所
欠官項計銀十四萬兩有餘尙有承領博學館生息銀

八萬兩又有承佃官田歷年積欠督糧道屯租銀一萬九千餘兩合計共銀二十六萬餘兩一時斷未能繳完徒事追呼難期清繳明倫堂紳局又向爲人所畏忌其田恐無他人敢承查省城廣雅書院尙有臣籌捐發商生息銀十餘萬兩當經批令該紳等將田一百三十餘頃繳出歸入廣雅書院其所欠之銀十四萬兩有零卽由廣雅書院代還此項屯田變價本係官田該紳等承領三十餘年收租已屬不少乃至今並未繳價卽論民間買賣田業多年總不交價豈能將田土據爲己物亦只有田主收回另售他主此時由官收回官田免其繳

價由廣雅書院代還既非將其私置田產罰以充公又非勸令捐助辦理可謂和平該紳等初以爲延欠官租田價官必無可如何聞臣決意澈辦乃與分局委員相商倒填年月分批繳銀四萬兩以爲藉口之計至其餘之十萬餘兩及所欠屯租仍無影響此該紳等之延欠租項舞弊朦混之實在情形也臣伏查沙田清丈給照升科係奉諭旨飭辦屢准戶部咨催斷不容稍有延欠至此項屯田本係官物尤非沙田民業可比當經臣飭委奏調廣西知府石承霖前往會同署東莞縣知縣張璿切實開導乃該紳視地方官爲無重輕抗匿不面該

縣等傳佃繳契該紳等喊令佃戶概行逃匿又復捏造長紅標貼稱此爲一邑之義舉其勢直不容官爲過問經臣札飭東莞縣知縣將管理明倫堂紳士指名詳參該紳等始稱來省商辦臣因該紳等旣來省城飭令沙田局委員署南海縣知縣王存善會同署東莞縣知縣張璿傳集該紳等勸諭該紳等仍行抗匿轉託他紳面見該縣等商辦該縣等令將田一百三十餘頃繳出該紳等乃云厯年所費築圍工本計銀數十萬兩查粵省沙田向章其始批給佃戶承租議定或五年或十年承耕而不收租項謂之荒頭其田應築之圍卽由佃戶出

資如需費過鉅亦係按年扣租田主無須費本此等章程通省皆知該紳等承領三十餘年現在已成上熟之田豈有荒頭尙未滿限之理亦何曾出過築圍工本亦不過藉此爲辭意在刁難臣復令東莞縣知縣諭飭該紳僅令收回未經繳價之八十餘頃其限外倒填年月所繳之四萬本應發還亦姑從寬作爲限內所繳不再令繳屯田並令酌給築工本銀四萬兩以示體恤又令易佃卽令明倫堂紳局作爲控田俾其繳租之外仍可冀沾餘利似此辦理實屬格外從寬從厚乃該紳等始猶不遵繼則口云遵辦而又求加築圍工本並云官給

之築園工本四萬兩不能將所欠之屯租及承領之博學館生息銀兩扣抵查積年所欠屯本係應完之項除扣博學館之項更可免交息銀該紳等不肯扣除其爲有意欲延欠兩款銀兩不問可知似此佔耕官田始終違抗實屬大干法紀且該縣區區一紳局已坐享膏腴二百餘頃之厚利而此八十餘頃尙欲全數霸吞而不肯撥歸書院使兩省士林稍爲沾溉不惟國憲難容且亦非人情所有尤可異者臣飭署南海縣知縣王存善會同勸諭原因該縣本係沙田局委員又係管理廣雅書院委員並非局外之人於本分公事分應秉公竭力

籌辦乃該紳恨該縣語言切實竟敢昌言於眾謂臣如奏參諸人臣雖調任湖廣該紳等必入京設法屬人將王存善參劾藉圖報復又託人告之臬司謂必與王存善尋讐洩忿意在挾制該紳等之意不過欲蹈何崇光之故智指使言官把持地方政務其視朝廷紀綱法令有如弁髦實在狂悖已極現據署東莞縣知縣張璿會同沙田局委員稟復並查該紳等銜名前來查有候選直隸州知州黎家崧捐納戶部郎中何慶修均屬攬權抗官營私專利大挑教諭郭康吉職員錢萬選均與黎家崧等朋比爲奸夥分私利遇事把持而黎家崧尤爲

劣蹟多端平日最好干預公事相應請旨將黎家崧何慶修郭康吉錢萬選等四員一并斥革永不開復又禮部祠祭司主事鄧佐槐亦係在局管事惟平日爲人尙近謹飭此事雖一同在局與聞尙非主謀應請暫行斥革俟查辦完竣察看能否改過有無阻撓情事再行奏請開復其欠租欠價之沙田八十二頃已飭署東莞縣知縣張璿將該田查封勒令收回撥作廣雅書院常產另行招佃承租並據東莞在籍主事黃崕呈請認租此項沙田每畝每年願繳租二兩五錢批准該紳承領每年將地租繳縣由縣解送廣雅書院作爲常年經費其

應繳變價花息銀十萬零八千兩卽由該書院經費項下照數撥交沙田局充餉以清款目其東莞明倫堂紳局所欠屯租一萬九千餘兩仍嚴行勒追如再敢延抗及有霸田不交情事再當從嚴參辦臣查廣東地方公正紳士固多而無知劣紳把持公事漁利抗官罔知法度者亦復不少最爲惡習沙田一端尤爲利藪豪强兼并病民抗官愍不畏法而又假借名目陰持利權直視官田爲己物官租爲應行乾沒之款該縣紳士亦多怨恨訾議側目不平臣辦理此案決不欲稍從刻覈迭次從寬而該紳等始終藐抗若不嚴加懲辦實無以清田

賦而做强橫不惟於沙田大局有妨且將謂劣紳漁利結黨抗官爲得計於紀綱風氣尤有關繫臣在任一日於地方應辦之事必當竭力舉辦斷不敢存五日京兆之心稍爲遷就

硃批另有旨欽此

廣西邊關修築礮臺請撥部款摺

光緒十五年十月二十日

竊臣前因法人在越南開鑿新路繞出南關上游蓄意深入其心叵測亟應置臺設備預爲之防已將廣西提臣蘇元春來東會商情形及籌款購礮緣由奏明在案所有購礮墊款應由西省協餉項下分年劃扣之處當

照奏案分晰電明廣西撫臣馬丕瑤去後復稱新購礮價歲扣協餉五萬邊餉不敷分撥西省力實難支且礮位甚巨舊築礮臺未盡合式必須另築合計添築之臺共二十座修築之費尙無所出等情電商另籌辦法前來臣查西餉維艱委係實情此項礮價十八萬兩外尙有運保費約二萬兩共二十萬兩每年協餉應卽改爲扣撥四萬實解八萬四年扣除十六萬其不敷之四萬仍由鄂省照每年實協之數扣解一萬四年解清以裨防局現在訂購礮價已准使德大臣洪鈞電復與克廠訂立合同應先付銀四萬餘兩已飭由善後局籌墊匯

付自明年起每年由廣西協餉項下照扣四萬陸續撥還墊款西省既有歲解現銀八萬防營裁固寬裕不裁亦可支持應由西省自行酌辦已與馬丕瑤往復電商妥協其舊臺既未合式此項新設之二十臺自應照新式加功修築令其一律精堅惟修築之紅毛泥青磚鐵器等項均須由香港及東省購往統計全臺礮堂兵房藥房暗道暨購辦物料轉運腳價竭力撙節就至少之數核計每座亦需九千餘兩臺二十座需銀十八萬餘兩查龍州現已通商實爲水陸衝衢西南鎖鑰與他處沿邊地方非敵人所專注者不同若遇春夏江漲由龍

州乘船建瓴而下數日卽抵潯梧以南關往事而論前有文淵諒山之阻祇以守備空虛強敵淪盟遂爾長驅直入今實逼處此又復開拓新路繞出上游包藏禍心若復不爲之備倉卒有變詎堪設想懲前毖後此項臺工實爲目前要務決不可緩惟需款甚鉅西省旣無可籌東省墊購礮價棉力已竭不敷之款不得已議於鄂省協餉籌加悉索俱盡實屬無可再籌合無仰懇天恩俯念廣西邊防重要有關全局飭部迅由各省關另撥銀十八萬兩解赴廣西務於光緒十六年夏間解齊爲修築礮臺之費以鞏邊陲將來工竣之時如實有不敷

當由東西兩省設法撙節騰挪籌辦臣極知部臣籌撥甚難各省關亦應接不暇第事關邊防至計爲數止此十八萬各省關分撥多者數萬少者一二萬只須籌解一次移緩就急尙可騰挪惟新式礮臺西省邊關諳悉者少俟此項撥款解到卽由廣東揀派臺工熟手委員前往會同監修以期合式經久
硃批該衙門議奏欽此

添募安潮營片

光緒十五年十月二十日

再廣東潮州府各屬民情素稱强悍同治以前械鬪劫擄焚殺相尋幾同化外經前督臣瑞麟於同治七年奏

派署潮州鎮總兵方耀督兵勦辦以潮人治潮芟夷翦
伐盡殲匪類地方綏靖垂二十年近來匪鄉漸覺蠢動
各屬時有械鬪之案該府緝匪辦案專恃各營弁所帶
之勇積威之漸不免流弊之滋軍民積不相能或借端
生事或呼應不靈該府素無營勇倉卒有事地方官幾
至束手無策竊惟兩漢郡守皆有典兵之責故能禁暴
安良吏治稱美今雖文武分途然遇有邊要强悍之區
文職大員亦必資以權力方不致釀亂掣肘查現署潮
州府知府曾紀渠整頓地方勤求民瘼與士民甚爲相
洽現經飭令選募三底營名曰安潮營薪糧一切照楚

軍營制支給專歸該署府統帶遇有匪鄉重案可資彈壓調遣一切劣紳土豪莠民悍族均可鈐束化導消患未形潮州與惠州毗連前經奏明查辦匪鄉以惠潮爲一路現查惠州未辦之匪鄉尙多勇力亦形單薄已飭令該署府不分畛域兼顧惠州如接到惠州府縣文移有需用兵力之處卽由該署府體察情形派撥弁勇馳往會同該營縣妥爲辦理

硃批該部議奏欽此

通飭各屬修建監獄遷善所片

光緒十五年十月二十日

再查廣東各府廳州縣監獄大半污濁狹隘甚至頽壞

不堪其繁劇大縣訟獄尤多甲於各省一切盜案鬪案擄拐搶竊等事無日無之皆係兇悍積惡之徒一經獲案斷不遽供又未便輕釋除無罪待質者歸入候審公所外以上各犯厯係押拘羈所其情節重要未經審結之人不便取保者亦暫行押候質訊其重要與監獄無殊而其苦累較監獄尤甚南海番禺兩首縣本境人犯已多又加以上司發交管押及各縣解省罪犯各營解送盜匪南海監羈礮房枷房共六處合計至五百餘人番禺三處將及三百人往往僅有兩楹三楹而拘繫數十人至百餘人者粵地酷暑一年之中大半苦熱穢濕

薰蒸疾疫易起瘵斃常多惻隱者尙知禁戒丁胥凌虐
昏昧者則付之不問殊不思愚民犯法但應治以例內
之罪不應使受非分之苦況又有案情未定者乎臣數
年來疊經通飭各屬清理監羈矜恤罪囚又於光緒十
三年將省城內綏靖營舊營房改修完整增添房舍建
設遷善所飭令南番兩縣將礮犯撥入一百數十人潔
其居處裕其衣食資以工本令人教以各種工藝俾將
來釋出謀生有具不致再蹈前辜本年夏間炎熱過甚
經臣委員周查南番監羈枷房礮房各處其擁擠困苦
情形實難言狀隨經分派委員徧查通省監羈情形逐

一稟復臣督飭司局詳加籌議除臬司廣州府衙門監獄自行籌捐修理外擬於通省府廳州縣中擇其訟獄較繁急需修理者如惠州府陽江同知嘉應州南海縣番禺縣順德縣香山縣新會縣東莞縣清遠縣三水縣新甯縣高要縣開平縣恩平縣曲江縣歸善縣長甯縣陸豐縣海豐縣連平州澄海縣茂名縣合浦縣瓊山縣二十五處俱飭令將監獄羈所大加修理務令寬大乾爽其惠潮肇高廉五府附郭之歸善海陽高要茂名合浦五縣礮犯較多游民亦眾並令仿照南番兩縣辦法設立遷善所所有此項修造工費暨常年經費爲數不

賢先其所急自應從省會辦起南海人犯眾多原有監
羈太窄城內購地價又最貴番禺人犯較少舊有監羈
尙不甚狹當經委員勘估南海縣監羈並修需銀二萬
五千餘兩番禺需銀三千五百餘兩據署南海縣王存
善稟稱自願捐銀一千兩就地令籌銀七千兩署番禺
縣楊文駿稟稱自願捐銀一千五百餘兩其不敷之數
由司局籌捐補足刻已經臣核定圖式興工趕造其省
外州縣先令其自行酌量籌捐不敷者稟請酌核發足
臣先捐廉以爲之倡查鹽商續捐善後經費餘款項下
尙存銀二萬餘兩卽先儘此項動支此外藩庫尙存有

積年陳案罰款繳款及臬司衙門贖款亦可湊集銀二萬餘兩以充修造工費其平日矜恤事宜除原有囚糧及該州縣自發羈犯口食飭令從優給發外並由臬司於外籌保甲經費項下撥銀二萬兩以充常年經費分別等差酌給添補以期粥飯醫藥涼席棉衣等項皆足於用其餘未經發款之處地方較簡均飭各屬將監羈自行酌量整飭並嚴禁丁胥刻減凌虐勒索諸弊伏惟恤刑之要固在決獄然一獄之成未定則待讞既定則待報往往經年累月使不有以善處則爰書未就而死者已纍纍矣況明刑弼教兩者相需儻純任嚴刑則

苟免無恥遷善莫由今力籌矜恤之方俾拘繫者無駢填之患以免瘼斃開釋者有自贍之術以免刑辟以後果能實力奉行於聖朝欽恤之治或亦可稍裨萬一硃批該部知道欽此

防城學額請照原奏添設摺

光緒十五年十月二十二日

竊臣前經覆奏欽州設官分汛各事宜摺內請將防城縣歲科兩試學額各添設文生四名歲試添設武生四名等因欽奉硃批該部速議具奏欽此茲准禮部咨行令查照分設縣治成案由欽州靈山學額內抽撥數名作為防城縣定額其欽州靈山各學額除分撥外作為

各學定額其歲試取進武生亦應由欽州靈山兩學額內酌撥等因奉諭旨咨行到粵自應遵照部議辦理惟查禮部所引成案與此案情形迥異且邊邑新設丁賦既增邊氓初附亦應加鼓舞以結民心有未可盡拘成案者敢爲我 皇上縷晰陳之查禮部覆奏援照廣東新會開平二縣分設鶴山縣一案議駁不知鶴山係就新會開平原有之地分出一縣戶口錢糧毫未加增學額自應抽撥防城係增設之縣新收邊地四百餘里增添戶口萬餘所屬啼鷄松逕豪了等處田賦及五峒丁糧地租歲徵二千五百餘兩他處土田以後尙可陸續

升科賦入歲有所加錢糧既增學額豈宜靳而不與前
奏照小學定額文武每試各四名勢難再少此防城學
額之例應添設者也欽州地方原轄六百里今以東興
如昔等處撥隸防城而益以靈山秋風博我菩提等練
及新收邊地所轄六百里有增無減欽州文風爲廉屬
之冠今升爲直隸州疆域式增而學額轉減於情理未
協於體制亦非所宜此欽州學額之仍應照舊者也靈
山人文蔚起而學額向止八名才以額限士多向隅今
既經割地又減學額未免過於偏枯此靈山學額之不
應抽撥者也自咸豐同治以來欽州團練衛民悍災禦

惠捐資已有十七八萬緡之多有案可查以地處邊遠
未知報明請獎迨後已奉有停止永廣學額之旨士民
久深缺望茲值邊邑新增經營締造借資民力者正多
亟應破格鼓勵多加學額以慰邊民慕義之心今請設
之額每試四名既不能多若再由欽靈兩學額內抽撥
必不能及四名防城得之不以爲喜欽靈失之適以爲
憂此又無益於防城而有損於欽靈者也而臣更有進
者欽州與越南接壤向有華人家居越南入學州籍者
越人耳濡目染亦多嚮學自越南多故異端橫行入主
出奴兼以財利誘脅吾民從之如市目擊頽波正宜拔

取秀髦振興文教黜邪崇正經正民興士習與邊防關係均非淺鮮在朝廷添設學額數名無損名器而邊地多得秀才數輩足鼓羣倫自應請照原奏添設防城學額歲科兩試各取四名歲試取進武生四名毋庸在欽州靈山兩學額內抽撥其廉州府府學十二名向爲欽州靈山合浦三屬分取每考欽州占三四名不等今欽州升爲直隸州廉州分取欽靈合之額尙在應請撥出三名歸入欽州學額以昭公允以上各節據署欽州直隸州知州李受彤妥議具稟由藩臬二司核明詳請具奏前來合無仰懇天恩仍准照臣原奏防城歲科兩試

額取文生各四名歲試武生取進四名毋庸在欽州靈山兩學額內抽撥並准將廉州府學額內撥出三名歸入欽州學額出自逾格鴻慈謹會同廣東學政臣樊恭煦恭摺具陳伏祈聖鑒訓示

硃批禮部議奏欽此

珠江隄岸接續興修片

光緒十五年十月二十二日

再臣建議修築粵省珠江隄岸以弭水患而興商務前經奏明先從南關天字馬頭築起並修造官輪大馬頭其迤東迤西及西關一帶分爲十段接續興工等情欽奉硃批該部知道欽此茲查天字馬頭第一段隄岸及

官輪馬頭工程現已告竣隄岸東西計長一百二十丈
隄工路工石料丈尺俱照前奏定程式堅實平整中爲
官輪大馬頭以大木椿列下水中上鋪堅厚木板作丁
字式長十一丈前寬三十丈後寬六丈前泊兵輪後爲
小艇灣入避風之所隄岸整齊畫一可永杜侵占之患
隄上馬路寬平排立行棧街衢清潔氣象恢宏所有填
築地段新修鋪房商民爭來承領繳價其隙地未修之
鋪屋均有商人分領自認興修西關房租地租一月以
來已經紛紛減價此後遞年地租及馬頭各租籌還墊
修全隄經費綽有餘裕向之言不便者悉已改稱利便

萬口一詞民情大懽查泰西各國富强之術工爲其基
商爲其用官任其事商營其利所有開設埠頭經營貿
易皆係官爲規畫主持粵省此舉原以弭水患而興商
務現在明效大彰迤東迤西未修之隄工業已選擇匠
頭曾發議定價值承領興築照奏案分爲十段南關自
天字馬頭修成之隄分起隄東至洪廟一段洪廟至東
濠口一段東濠口至觀音廟觀音廟至川龍口一段隄
西至潮音街一段潮音街至源昌街一段源昌街至同
德街一段西關自西礮臺起至橫沙一段橫沙至半塘
一段半塘至澳口一段一律築成石隄共長一千八百

丈有奇飭令如式趕築興修限一年半告竣其餘填沙
開涌建橋種樹及局用一切均飭監修委員等隨時核
實勘估撙節辦理至西關增步應加之圍基橫沙應修
之商輪馬頭河南應疏之洲頭嘴河道應開之鰲魚洲
江面以及招商承辦電燈馬車各業一俟全隄工成卽
行接續籌辦大率此項隄路圍河各工程雖共需銀四
十餘萬然可以隨墊隨收並無須全墊巨款至於將來
利益租豐稅旺官民均利確有把握惟首段成效已見
將來必有猾商豪棍飾詞捐餉希圖包攬承修一則必
致工程草率體式參差橋涌減少鋪面猥雜攪礙全局

二則徒見小利必致與沿河鋪民水濱漁艇苛求爭競
構訟生端三則租賃居奇以全省商民之開源據爲數
家壟斷之利蔽種種流弊萬不可行故此項工程必應
明白立案總以全工仍歸官辦爲宜不容商棍干豫攪
擾

硃批該衙門知道欽此

恭報交卸兩廣督篆日期摺

光緒十五年十月二
十二日

竊臣欽奉諭旨調補湖廣總督當卽具摺叩謝天恩茲
新任兩廣督臣李瀚章業已抵粵臣當將兩廣總督關
防鹽政印信王命旗牌暨文案卷宗於光緒十五年十

月二十二日派委督標中軍副將王世清廣州府知府
孫楫齋送新任督臣接收卽於是日交卸督篆伏念臣
渥承恩命督粵五年邊海繁難菲材魯鈍雖日日鮮偷
安之暇而事事深內歉之心顧牖戶而亟綢繆撫閭閻
而慙富教事多草創修飾尙望於將來恩許量移報稱
豈殊於易地新任督臣曾任廣東藩臬在粵最久情形
素悉辦理自必裕如臣再將近日應辦事宜詳細告知
現在料理行裝定於下月初間由海道乘輪遵旨馳赴
調任

硃批知道了欽此

調蔡錫勇等赴鄂差委片

光緒十五年十月二十
二日

再臣奉命督辦鐵路事宜任大責重事屬創舉亟應廣
資羣策先事儲才查湖北省漢口地方洋商紛集宜昌
以上新議行輪交涉事體本屬繁重現在當務之急尤
以開采製造諸事爲先必須精於綜核勇於任事之員
方足以備任使茲查有遇缺卽選道蔡錫勇器識閎遠
熟悉洋情曾充美日各國繙譯參贊等官奏明辦理粵
省洋務有年近來粵防交涉創造一切事務悉以諮之
該員力持大體動中機宜深資倚任又在籍山西候補
道陳占鼇前因肇慶黃江稅廠改章奏派該員試辦綜

理精密任怨任勞每年除原額解足外新增溢解銀六萬有奇得供海防購礮要需頃臣奏請開采晉鐵卽派該員前往澤州潞安兩府查勘鐵礦籌度轉運道路及設廠安爐之處又候選知府沈嵩齡總辦兩廣電局創設東西兩省各路電綫不避艱險悉臻妥協工鉅用宏該員竭力撙節杜絕虛糜又廣東候補知州凌兆熊操履謹飭才識俱優博學多通於洋務西法俱能殫精考究該員本係廣西人員前因辦理洋務調東差委嗣經改留廣東於交涉事宜深資得力又廣東候補知縣趙鳳昌志潔才敏辦事誠實心精力果通達時務於電綫

事宜及外洋軍火最爲考究精細又江蘇補用知縣薛培榕才長心細操守端廉歷經臣奏派創設廣東槍彈廠及錢局工程開鑄銅錢銀元各事宜始終其事精思勤力工料一律精堅於安置機器撫馭洋匠精細得法實屬辦理工程最爲出色可信之員以上六員均查明在東並無經手未完事件應請調赴湖北差遣委用除陳占鰲卽由粵派赴山西外其蔡錫勇等五員卽由臣隨帶赴鄂以赴事機而資得力合無仰懇天恩俯允所請出自鴻慈謹附片具陳伏祈聖鑒

上諭張之洞奏調員差遣等語候選道蔡錫勇山西候

補道陳占鼇候選知府沈嵩齡廣東候補知州凌兆熊
候補知縣趙鳳昌江蘇候補知縣薛培榕均著發往湖
北交張之洞差遣委用欽此

添募親兵帶鄂差遣片

光緒十五年十月二十二日

再臣在廣東向有親兵礮隊二百名專練行營軍礮及
各種新式洋槍操練精熟茲奉命調任湖廣查鄂省地
近中原難得外洋軍火新式快槍已屬罕覯後膛車礮
更係絕無以彼上游重鎮南北交衝綢繆豫防自宜講
求武備今擬將此項親兵帶往鄂省俾各營觀感肄習
漸開風氣臣到任後當再籌款添購利械分給各營以

備不虞現飭將親兵添招五十名連前共二百五十名合成一底營派委廣東水師提標儘先補用都司吳良儒管帶隨臣赴鄂聽候差遣所需薪糧在粵時照章支領截至到鄂之日卽由鄂省給發並在粵借撥黎意槍一千枝彈一百萬攜帶赴鄂分給發各營操練該價到鄂繳還

上諭張之洞奏隨帶親兵前赴湖北等語各省督標均有額定兵弁足敷差委本不必另立親兵名目近來總督赴任輒復添帶親兵前往旣多糜費且與定制不符該督所請添招親兵五十名著不必行其原有之二百

名卽著管帶官吳良儒帶回廣東不准隨往湖北經此次訓諭之後如督撫升調赴任倘有再行瀆請者定卽與以懲處不貸將此通諭知之欽此

恭報交卸兼署廣東撫篆並起程日期摺

光緒十五年十月

月二十七日

竊臣恭閱邸鈔光緒十五年九月初七日奉上諭廣東巡撫著游智開署理等因欽此臣現已於十月二十二日交卸兩廣督篆奏報在案所有兼署撫篆應卽一併交卸惟游智開署理粵撫之部文候至二十五日未到恐中途或有他故當經電請總理各國事務衙門代奏

可否於奉到電旨後卽將撫印交游智開署理請旨遵
行茲於二十六日承准總署復電奉旨張之洞電奏已
悉廣東巡撫印務卽著移交游智開接署欽此遵卽於
二十七日將廣東巡撫關防太平橋監督關防王命旗
牌文案卷宗派員齎送游智開接收臣卽於是日交卸
兼署撫篆卽日起程前赴虎門海口候有輪船卽行馳
赴調任

硃批知道了欽此

張文襄公全集卷二十八終

紹興孫家棟校